

庶徵典

庶徵典第一百十九卷

地異部彙考六

明一

太祖吳元年冬十月福州地震 按明昭代典則云云

洪武元年夏六月瑞州府地震 按江西通志云云

洪武五年地震 按明昭代典則洪武五年八月太原府徐溝縣西北地震自癸未至乙酉日

按廣東通志洪武五年四月廣州地震舊志四月二十一日辰時地震是年八月二十日卯時又震有聲如雷地坼二三里許

惠宗建文元年京師地震 按正氣紀惠宗本紀建文元年三月京師地震求直言監察御史尹昌隆言奸臣專政陰盛陽微謫見於天帝惡之故貶徐曰求直言而以直棄之人將不食吾餘復原職既而昌隆復上疏觸忌御史金焦劾其放言肆害斥昌隆爲福寧知縣 按名山藏燕王還北平

傳檄天下曰太孫卽位京師地震占書曰地德至靜不宜動搖若主弱臣強則必震動臣下擅權則

土不寧變怪生焉陽伏不能出陰出不能入陰陽相激地必震動動於宗廟宮殿者人君失信國無忠臣誅伐不以禮上下不相親也

建文二年會稽地震 按浙江通志云云

成祖永樂元年地震 按名山藏永樂元年十一月上顧侍臣曰北京山西寧夏一時地震朕心惕然爾言其故侍臣對曰兵戈土木應也上曰比年兵旅饑饉民困甚矣朕夙夜圖之朕避暑樓居武門端門而已後宮墊隘不敢增修慮土木也若云兵戈政當勅邊修備 按湖廣通志永樂元年施州地大震以民奏設帥辟王宣撫等七十餘處相攻害 按廣東通志永樂元年八月辛未潮

州地震

永樂二年地震 按大政紀永樂二年十一月甲寅京師地震諭文武羣臣宜戒謹修職共回天意凡軍民有不便之事當速改之 按江南通志永樂二年應天地震

永樂六年地震 按山東通志云云

永樂十四年九月癸卯京師地震 按大政紀云云

仁宗洪熙元年地震 按大政紀洪熙元年三月甲戌南京地震者三

宣宗宣德元年秋七月北京地震 按大政紀云云

宣德二年二月南京地震 按大政紀云云

宣德四年春正月兩京地震 按大政紀云云

英宗正統五年地震 按名山藏正統五年十月蘭縣莊浪同以月朔地震十日乃止壞城堡官民廬舍壓死男女二百餘人勅三司修葺賑卹之

正統十年地震 按山東通志正統十年地大震 按福建通志正統十年十一月癸未地震連

日夜凡九次鳥獸之屬皆辟易飛走山崩石墜地裂水湧公私屋宇摧壓者多凡百餘日乃止

代宗景泰二年地震 按名山藏景泰二年八月壬申南京地震

景泰三年地震 按名山藏景泰三年九月南京地震

英宗天順二年地震 按雲南通志天順二年七月地震金齒司東南城郭兵器俱燬

天順四年地震 按浙江通志天順四年十二月會稽地震

憲宗成化元年地震 按大政紀成化元年二月大雨黑黍於襄陽地震屋宇搖動蟲蟲有聲四月河南鈞州地震有聲至二十三日方止 按湖廣通志成化元年襄陽地震有聲

成化四年地震 按大政紀成化四年八月癸巳辰刻京師地震有聲九月壬午京師地震御史康永韶奏考察兩京官命吏部都察院會各堂上官考察

成化五年地震 按湖廣通志成化五年冬十月朔安陸地震有聲城垣傾者數丈

成化六年地震 按大政紀成化六年正月丁亥河南地震兵科給事中郭鏜乞禁約天下今後不

許獻言祥瑞置不問鏜言今年正月河南布政司奏地震既而掌太常寺事李希安奏甘露降俱下

禮部尙書鄒幹等卽以甘露事上聞臣備位諫官適覩二事不敢不言蓋遇災異則懼心起悅休祥

則驕心萌懼則修德驕則怠政故聖人不貴祥瑞春秋獨記災異商之中宗高宗一則桑穀生一則

雉鳴鼎耳二君因巫咸祖乙之言恐懼修省變災爲祥故能享國長久商道益隆漢文景之時日食

地震山崩川湧星變之異未易遽數二君恐懼修省今年下詔勸農桑明年下詔免租稅以致民和

氣應海內富安惟遇災而不知懼然後亂亡隨之皇上踐祚於茲六載凡列位大臣職居典禮者宜

如巫咸之告君祖乙之正事鄒幹等乃以先奏地震遲留不言顧以後奏甘露諂言瑞應跡其所存實懷容悅之私伏願皇上以年豐爲瑞以民安爲祥以賢才爲寶遇災而懼聞瑞不喜仍罷幹希安二人以謝天下及禁約天下今後不許獻言祥瑞仍以地震天旱因災求言博訪政事缺失民間疾苦以次施行使天下後世知皇上不愛祥瑞不近諂諛懼災修德其爲瑞應豈不大哉上曰朕未嘗以此怠於德政郭鏜安得爲此言姑置之以湖廣地震遣官祭告境內山川八月己巳廣東高雷二府地震有聲

成化七年地震 按雲南通志成化七年春正月順寧地震聲如雷踰日始寧

成化八年地震 按山西通志成化八年地震太原府境內七月再震有聲如雷 按貴州通志

成化八年冬十一月地震

成化九年地震 按山西通志成化九年三月石樓縣地震七月又震有聲

成化十一年地震地裂 按江南通志成化十一年蘇州松江地震生白毛 按浙江通志成化

十一年諸暨地震

成化十二年地震地湧血 按大政紀成化十二年正月辛亥南京地震有聲正月南京六科十三道各奏南京陰霾遮日地震有聲乞加修省下所司知之四月庚寅夜山西太原府地震有聲十月辛巳京師并薊州等處地震有聲 按浙江通志成化十二年嘉興地震山陰地湧血

成化十五年地震 按大政紀成化十五年五月乙丑直隸常州府地震有聲生白毛九月丙子直隸無錫常熟二縣地震有聲 按浙江通志成化十五年九月嘉興地震 按湖廣通志成化

十五年九月黃梅地震

成化十六年地突起地震 按大政紀成化十六年六月長樂縣昆田里平地突起小阜阜通三四尺人畜踐之輒陷尋復於其左湧一山廣袤五丈餘其占女主爲男之兆唐武后時有此但今異幸小耳九月辛丑四川威州地震有聲 按山東通志成化十六年九月鄒平地震 按廣東通志成化十六年夏五月香山地震

成化十七年地震 按大政紀成化十七年三月禮部尙書周洪謨等奏災變修省事宜從之禮部以二月初十日南京及江北四府山東河南等府州縣俱同日地震有聲奏言考之傳記地動千里

有大災又云春動者歲凶二月動者水災今所動不止千里又況鳳陽南京皆祖宗根本之地宗廟社稷所在關係尤重乞行各處守臣理冤抑恤孤寡以消變異廣儲蓄省費用以備歲凶濬溝渠築河堤以防水患毋徒事虛文四月南京六科給事中周紘等十三道御史陳金等因災異劾南京禮部侍郎李本兵部侍郎馬顯工部侍郎劉俊國子監祭酒王慎左副都御史胡拱辰鴻臚寺卿李鎔俱不職乞罷黜上下部悉留之金等言南京地震有聲白毛頓長猛虎近城傷人且當陽春和煦之時而寒風淒雨有類秋冬臣惟根本重地災異獨甚皆大臣不職所致

成化十八年山陰地震 按浙江通志云云

成化十九年地震 按畿輔通志成化十九年春三月宣府地震 按山東通志成化十九年夏四月兗州鉅野等處地震有聲

成化二十年地震 按名山藏成化二十年正月庚寅京師地震是日永平諸府及宣府大同遼東地皆震動宣府地裂湧水天壽山密雲古北口居庸關一帶城垣墩臺驛堡多至潰裂人有壓死者壬辰敕諭文武群臣曰朕夙夜政理治効未著地震京師天戒至矣齋心滌慮省愆修德爾文武群

臣宜各痛加省改懋稱厥職以毗朕志

按福建通志成化二十年十二月戊寅地震有聲如雷

成化二十一年地震

按山西通志成化二十一年正月地震洪洞趙城震者三蒲州大震壞民廬

舍房屋牆垣無數至五十日而後始止

按蒲州志成化二十一年正月地大震有聲牆屋傾覆

五十日始止

按洪洞縣志成化二十一年正月地震者三

成化二十二年裂地地震

按陝西通志成化二十二年五月商州地裂六月咸寧縣地裂傾陷民

房屋牆垣無數

按福建通志成化二十二年九月地震三次

成化二十三年地震

按山東通志成化二十三年三月德平地震

按陝西通志成化二十三

年七月二十二日關中地震如雷多崩圯屋舍壞男女死者千九百餘人

按湖廣通志成化二

十三年九月衡陽德安地震

按廣東通志成化二十三年五月庚申廣州地震

孝宗弘治元年地震

按雲南通志弘治元年大姚地震白塔裂再震復合

弘治四年地震

按明外史彭韶傳弘治四年南京地震御史宗彝等言韶喬新強珍謝鐸陳獻章

章懋彭程俱宜召用不報

弘治五年地震 按山東通志弘治五年夏五月濮州地震

弘治六年地震 按山西通志弘治六年榆次地震有聲如雷

弘治七年地震 按江西通志弘治七年十一月地震有聲

弘治八年地震 按大政紀弘治八年十月南京地震十一月陝西地震 按廣東通志弘治八

年夏六月高明地震

弘治九年地震 按四川總志弘治九年綿竹地震自東南而西北房屋擗動

弘治十年地震 按大政紀弘治十年五月各省地震詔求直言 按浙江通志弘治十年九月

杭州地震

弘治十一年地震 按雲南通志弘治十一年十月浪穹地震有聲如雷

弘治十二年地震生白毛 按浙江通志弘治十二年樂清地震生白毛 按雲南通志弘治十

二年雲南縣地震夏六月景東地震十日夜蒙化地大震民屋多圯厥明地生白毛長寸許文廟獨
無冬宜良地震有聲自西南來如雷民居盡圯壓死以萬計旬月常震越四年始寧十二月澂江地

古今圖書集成
震官民廬舍傾壞人多壓死月餘乃止

弘治十三年地震 按福建通志弘治十三年三月地震有聲

弘治十四年地震 按大政紀弘治十四年正月朔陝西地震時西安延安慶陽潼關等處地震有聲韓城縣尤甚聲響如雷傾倒官民房五千餘間壓死男婦一百五十自朔至望震猶未息縣東安昌八里徧地決破湧水有裂開地長一二丈或四五丈者湧出溢流如河陝西地震水涌林俊上疏謂變不虛生必有其應歷述漢晉以來宮闈內侍柄臣之禍且乞減齋醮清役占汰冗食止工作省供應節賞賜戒逸欲遠佞幸親賢人兵部尙書馬文升上疏弭災急務上嘉納之文升言地道主靜動則失常考古典凡言地震者乃坤不承乾臣不承君之兆然亦未有震于元旦者亦未有裂地成河者此乃非常之異古今之所罕見也陝西四鄰邊境而延慶二府又密邇河套地震未已而外國乘之侵凌之兆亦已明矣值茲民困財竭兵衰將懦之時而欲安內以攘外修德以弭災亦甚乎其難矣伏望陛下祇畏變異痛加修省節金帛以備緊急罷齋醮以省浪費止傳奉之官禁奏討之地將陝西織造絳褐內臣早取回京以蘇軍民之困宗社生靈庶幾有賴上曰覽奏具見忠愛所司卽

便施行

按山西通志弘治十四年正月朔蒲州地震有聲如雷形勢閃蕩如舟在浪中官民牆

屋傾頽壓死人畜甚多

按江南通志弘治十四年松江地震屋宇動搖

按雲南通志弘治

十四年正月十六日劍川州地震聲如雷土城官民廬舍皆圯

按異林弘治辛酉元日朝邑地

震如雷城宇撼落者五千三百餘所徧地竅發如甕口或裂長一二尋湧泉泛濫幾成川河迄望夕

猶震搖不息人民逃散

弘治十五年地震

按山東通志弘治十五年汶上地震有聲如雷秋九月七日戌時濮州等處地

震湧水四出民居傾壞者千餘壓死者五十餘人一日三十餘震

按山西通志弘治十五年保

德地震有聲如雷

按河南通志弘治十五年考城地震

按雲南通志弘治十五年八月騰

衝地震

弘治十六年地震

按江西通志弘治十六年八月樂平地震

弘治十七年地震

按山東通志弘治十七年秋九月金鄉地震越十日復震

按山西通志弘

治十七年萬泉地震

按陝西通志弘治十七年地震二次正月華陰地震

弘治十八年地震 按江南通志弘治十八年松江地震有聲如雷 按浙江通志弘治十八年

兩浙地震生白毛

武宗正德元年地震 按大政紀正德元年春正月地震 按陝西通志正德元年二月郃陽縣

地連震六次 按浙江通志正德元年十二月温州地震生白毛 按江西通志正德元年九

月餘于地震 按雲南通志正德元年雲南縣地震生白毛

正德三年武強地震生白毛 按畿輔通志云云

正德四年地震地裂 按畿輔通志正德四年武強地震生白毛 按浙江通志正德四年德清

新昌地震 按廣東通志正德四年冬十月惠州地震 按湖廣通志正德四年春棗陽地震

祁陽地裂泉溢七月江夏地震生白毛冬十月靖州地震一日三次 按福建通志正德四年連

江地生白毛焚之有髮氣 按廣東通志正德四年秋七月興寧地震九月高州地震

正德五年地震 按明昭代典則正德五年秋七月四川威茂地震有聲如雷漳川樂至州縣皆震

按畿輔通志正德五年夏五月衡水地震 按浙江通志正德五年湖州地震生白毛

按湖廣通志正德五年五月靖州地震

按廣東通志正德五年秋七月地震

按廣西通志

正德五年六月蒼梧地震次日生白毛

正德六年地震

按大政紀正德六年十一月京師地震

按浙江通志正德六年杭州地震

按江西通志正德六年春正月朔東鄉進賢地震

按雲南通志正德六年騰衝地震楚雄北勝

州地震有聲自西北來牆屋俱圯五月六日地震城傾西北圯民居千餘所

按貴州通志正

德六年秋九月都勻地震

正德七年地震

按陝西通志正德七年二月渭南縣地震

按江南通志正德七年蘇州地震

有聲生白毛

按浙江通志正德七年杭州連月地震生白毛

按廣西通志正德七年六月

北流地震

按雲南通志正德七年八月庚午金齒騰衝地震辛未大震有聲城堞官署民居傾

壞死傷者甚多

正德八年地震

按廣西通志正德八年秋八月宣化縣地震聲隱隱如雷

按雲南通志正德

八年臨安地震有聲如雷三日乃止

正德九年地震 按山西通志正德九年壽陽地震聲如雷日三次

正德十年地震 按山東通志正德十年十一月沂州地震 按浙江通志正德十年遂昌地震

按湖廣通志正德十年荊州地震有聲十一月復震常德豐州南漳地震 按雲南通志正德十

年蒙化地大震池中水立景東地大震民居半圯五月六日武定祿豐鶴慶姚安麗江大姚同日地震官民廬舍傾圯殆盡鄧州地大震六月又震八月又震九月太和地震屋牆盡塌壓死數百人日每小震踰旬始寧

正德十一年地震地裂 按浙江通志正德十一年松陽地震 按湖廣通志正德十一年江夏

地震八月武昌地裂 按福建通志正德十一年八月地大震

正德十二年地震 按浙江通志正德十二年杭州永嘉樂清地震 按江西通志正德十二年

夏四月豐城地震 按福建通志正德十二年四月十九日沙縣地震是年將樂董旭等爲亂又

是年地生毛一夜長二三寸有白有黑民驚駭者兩閩月乃沒

正德十四年地震 按江西通志正德十四年春九江地震黑氣彌月始散 按廣東通志正德

十四年增城博羅地震

正德十五年地震 按山東通志正德十五年八月夏津縣地震 按浙江通志正德十五年寧

波地震 按福建通志正德十五年三月二十五日安溪地大震聲如雷 按廣東通志正德

十五年秋八月澄邁田移隅都民曾攻石窟田下丘連苗移疊上丘高近尺 按廣西通志正德

十五年六月二十七日夜蒼梧地震

正德十六年地震 按浙江通志正德十六年冬至松陽地震遂昌地吼其聲如虎

世宗嘉靖元年地震 按山西通志嘉靖元年秋八月陽曲榆次寧鄉地震 按陝西通志嘉靖

元年夏寧夏地震有聲如雷 按江西通志嘉靖元年九月建昌地震有聲 按湖廣通志嘉

靖元年三月黃陂地震棗強穀城亦震沿江地震至嶽麓江而定城郭多沒

嘉靖二年地震 按大政紀嘉靖二年正月應天鳳陽山東河南陝西地震南畿青齊雍豫諸州同

時地震給事中黃臣上言太監蕭敬久竊重柄復開傳乞之門地震之變斯人致之宜加竄斥不報

十二月南京地震大雷電以雪是月下弦地震雷雪連日夜不絕至明歲元日地復大震南京禮部

侍郎劉瑞上言地震不于他所而獨于南京不于他日而于立春元旦凡有耳目莫不駭愕蓋南都天下之本而軍民又南都之本也本安則天下安矣謹條大事以聞一曰多發帑藏二曰嚴督逋負三曰督察賑濟四曰修祭告五曰謹戒備六曰端大本帝嘉納之 按陝西通志嘉靖二年正月陝西地震 按廣東通志嘉靖二年秋樂會地震聲響如雷民謂大軍將至奔走數日乃定

嘉靖三年地震 按陝西通志嘉靖三年九月會寧縣地震是月河州衛地震 按浙江通志嘉

靖三年嘉興山陰地震 按湖廣通志嘉靖三年襄陽宜城均州地大震

嘉靖四年地震 按全遼志嘉靖四年夏五月遼陽地震者三 按廣西通志嘉靖四年冬十二

月都司地陷大門左旂纛廟前忽有聲如雷陷地一穴闊二丈五尺深一丈次日離前穴三丈許復陷一丈闊二丈深二丈有青氣一道上冲數丈良久始散

嘉靖五年地震 按山西通志嘉靖五年澤州高平陽城地震 按雲南通志嘉靖五年八月通

海地震自東南來有聲如雷壞城堞官署民居壓死者甚多